

QUÆSTIO MEDICA.

*Cardinalitiis Disputationibus manè discutienda in Scholis Medicorum,
die Jovis quarto Aprilis.*

M. CLAUDIO GUERIN, Doctore Medico, utriusque
Pharmaciae Professore, Præside.

*An alimenta eò ad coquendum faciliora quò propius ad ventriculi
temperiem accedant?*

I.

SI nihil de partium nostrarum substantia decederet, nulla fumen-
di cibi necessitas esset, nullave fames naturæ consentanea. Verùm
qui in generationis primordiis viget igneus calor, corpusque coag-
mentat, partes solidas fingit, iisque incrementum affert, donec ossa
ductilia sunt; calor ille vitæ opifex, humidum primigenium, cui una
cum spiritu insidet, continuò depascitur. Idcirco * alimento nutriente,
quasi nutriente, & nutrituro opus est, ut quod dissipatur, utcunque
instauretur, sicque retardetur marcor, stirpium ariditati persimilis.
Alimentum autem nullum confici integrè atque omninò potest. Hinc
altera interitus nostri causa, quæ illum accelerare haud paulo pluri-
mum solet, inevitabilis excrementorum proventus. Supremus vitæ
dies nec optandus, nec metuendus est. Sed nihil acceptius quam om-
ne tempus ætatis sine molestiâ posse degere, & naturalem vivendi fi-
nem attingere, qui accidit, cum certâ mente integrisque sensibus,
opus suum quæ coagmentavit, eadem natura dissolvit. Ad vitæ cur-
sum quem natura dat, & quem ipsa sponte deficiens terminat, per-
agendum, oportet impigrum esse ad laborem, ciborum esui præ-
vium, se cibis non ingurgitare, eosque eligere qui ad coquendum fa-
ciliores fuerint, seu causæ chyloleos effectrici accommodatiores.

II.

NULLUM alimentum naturæ nostræ prorsus simile est. Quod-
libet coqui postulat, ut assimiletur. Vera & proxima assimi-
lacio quâ sic alteratur, ut partis temperiem & formam induat, nutritio
est. Partes omnes sanguine nutriuntur. Is non in cassum in ossium ca-
vernulis reperitur, quæ saturo rubore inficit. Nec frustra cranium
subit, quo derafo exudans cernitur. Supponantur tenui sanguine alen-

* Triplex illud alimentum, ex Hipp. lib. de Diata.

dæ partes, vasa obtinuisse densioribus contexta tunicis, crasso rarioribus, serum tenuius quocunque sanguine facilius ipsa permearet, nec ulla pars frueretur alimento conveniente, nisi ipsum traheret accommodatè ad eam temperiem & formam quas à mixture elementorum accepit. Erasistratus* & Herophilus primarum qualitatum crasim nutritionis reëtricem exosi, in sarcienis ulceribus dogmata sua prodere, & empiricos turpiter sequi, ac cum iis mentis luce seu ratione destitutis cœcutire cogeantur. At seduli temperiei scrutatores, qui corporum & medicamentorum qualitates norunt, non modo remedia siccantia corporibus ulceratis aprant, sed etiam plura morbo adversa temperando, salutaria reddunt. Ulcus v. g. cavum, mediocriter siccari postulat, ideoque oleum & cera quæ non desiccant, ulcus inquinant & sordidant. Ærugo vero cum dolore erodit, inflammat, & liberaliore usu convulsionem excitat. Hæc tamen tria commista mediocriter siccant, & ulcus ad sanitatem perducunt. Assimilatio remota est ea quæ ventriculus è cibis extractum succum, in chylum convertit, seu è cibis chylum generat; quod est corpus liquidum, album, subdulce, coagulationis capax, in sanguinem commutabile. Quo alimenta nutritura seu cibi, chyloseos effectrici causæ ea assimilare nitenti magis obsecundant, eo ad coquendum faciliora censenda sunt. Ipsa flatus, ructus, fluctuationem, ventriculi gravitatem, nauseam, vomitum, spirandi difficultatem non pariunt. Ipsa cedunt in laudabilem sanguinem, qui vires & colorem alit. Ipsorum usum felix nutritio, sanitas seu functionum omnium integritas, & naturalis pulchritudo consequuntur.

III.

PARTIUM consimilium temperies, earum sensibilis forma, in alimentum, quasi nutriens, seu sanguinem inducenda; nutritionis terminus est; ac proinde principium appetitionis, attractionis & coëctionis. Ideo à sanis, etiam ex naturâ suâ, seu actionibus suis convenienter intemperatis, similia appetuntur, ab iis vero qui morbidâ intemperie afficiuntur, contraria: quoniam ea dum alterantur alterant, & intemperiem adventitiam aut immodicam minuendo ad genuinam dispositionem propiùs accedunt. Nonne in hoc contrariorum appetitu instinctus quidam animæ proprius. Chyli in sanguinem nutritioni & vitæ idoneum mutandi effectrix est ventriculi temperies, plus minus calida humida, quæ vasorum plurimorum in eum influentium, & circumstantium viscerum vapido calore adjuncta, cibos quos, duobus oribus constrictis, complexu suo continet, emollit, & quædantenus putrefacit, humidi à sicco diremptu. Ipse ventriculus è cibis mollescentibus succum paulo crassiorem elicit, qui rejectaneis supernatat, eumque sic alterat, ut nihil prioris misti retineat, eoque corrupto, novum mistum seu chylus generetur. Rejectanea vero in

* Gal. lib. 3. Meth. Terrap. cap. 2.

mista se ipsis imperfectiora degenerant, & ulteriori putredine cum fectore inquinantur. Quædam tamen substantiâ & colore nihil aut minimum mutantur, ut uvæ ursinæ Mauris ribes dictæ, cerasa, & betæ rubræ radix. In vivente adhuc animali, diviso ejus peritonæo, pluries compertum est* ventriculū assumptos cibos supernè infernèque & undique complexum, ac immotum, cibis quasi conjunctum adhærere, tuncque pylorum exquisitè claudi, velut os uteri in gravidis, sed absolutâ coctione referari, eodemque tempore ventriculū completus motu, intestinorum ritu moveri, ut chylum & rejectanea compellat in intestina. Immotus in chylosi peragenda ventriculus, ciborum tritum & fermentationem excludit. Ille fieret motu ventriculi spontaneo, & impulsu muscutorum finitimorum; hæc seu spiritus se exolvere nitentis impetus, aut naturæ igneæ vel ignescentis sublimitatis avidæ contentio, eundem distenderet & amplificaret.

I V.

NON modo sine ciborum tritu chylosi peragitur, isque ad eam moliendam inutilis est, sed etiam isdem ipsam efficere non potest. Per molestum esset ventriculo tandiū percuti & contundi, quantiū cibi tererentur. Sed esto, iteratam percussione non moleste ferat, triturâque cibos dispescat in corpuscula etiam individua seu atomos; quodnam principium corpuscula ista eo situ & ordine collocabit, qui requiritur ut ex iis componatur corpus liquidum, album, subdulce, homogeneous, quod contrahi possit. Et cum chylosi non ritè procedet, quænam pars invalida, & quo præsidio accingetur, ad motum ineliori trituræ convenientem. Quoad fermentationem ciborum in ventriculo, unde petetur fermentum quo dissolvi possint. An à portione aliqua ciborum in ventriculi rugis superstite? An à succo à primæ ventriculi tunicæ glandulis expresso? An fermentum illud acidum, an alcali, aut utriusque particeps? Quomodo acidum & alcali in se invicem agent aut colluctabuntur, quæ ratione saporis & figuræ nihil contrarium habent, quo se ab eodem subjecto expellant? An alcali foraminibus ad patiendum gestiens, acidum ad congressum invitabit, quod ob angulatam, ut aiunt, figuram ad morum inhabile est? An præsto erit materia subtilis, quæ ut se retinaculis expediat, acidi aculeos seu cuneolos in alcali foramina intrudet? Nonne materia illa se in libertatem assertura, vacuos partium poros facilius perrumperet, quam acidum in alcali adigeret. Verum materia illa supra modum subtilis comprehendendi non potest. Ipsamet informis actu & motu caret. Sola forma materiam perficit, corporatæque vim motricem impertit. Demum quomodo posita ciborum in ventriculo fermentatione, chylosi læsa redintegrari poterit? Quale demetur vel addetur fermentum, quo acumine vel foramine præditum? Undè accersetur materia subtilis, præsertim eâ quantitate

* A Gal, ut ipse refert 3, de Natural. function.

quâ tale acumen in tale foramen inducat ? Cujus rei certa non est notitia, certum remedium inveniri non potest.

V.

HIPPOCRATES aphorismorum conditor, alimentorum coctionem, nutritionem, & accretionem, à calido nativo, putâ frigidi, humidi, & sicci mitione temperato fieri scienter asseruit. Ventres, inquit, hyeme & vere naturâ calidissimi, & somni longissimi, ideoque copiosiora alimenta tunc temporis exhibenda. Item qui crescunt, calido innato exuberant, plurimoque alimento egent, ne corpus absumatur. Hæc veræ Medicinæ parentis dogmata, qui ob admirabiles artis successus perpetuâ memoriâ celebrabitur, religiosè observenda, si quæ ad finem salutaris professionis collineare, vario usu comprobatum est, repudianda forent, sola ad bene medendum experientia sufficeret, quæ tamen divini senis oraculo, judicio quamvis difficili dirigenda & stabilienda. Cave ne aphorismorum conditorem cum libri de veteri Medicina auctore confundas. Hi multum inter se discrepant ratione principiorum, modi quo nocent, & curationis. Ille amarum, acre, acidum, falsum, insipidum, & alia sexcenta ignobilia astruit. Hic calidum, frigidum, humidum, siccum, in artis suæ principiis ponit. Illi quod secretum est, morbum parit; idque coquitur dum remiscetur, aut tempestivè interdum, à natura vel arte expurgatur. Huic secretum, aliquid febrile suppuransve coctum est, atque idoneum redditum quod excernatur. Idque si relinquitur, non remiscetur, sed recidivum morbum facit, vel in aliqua parte abscessum. Ideoque nisi coctum illud & secretum, à natura integrè judicatum fuerit, Pharmaciâ tollendum. Parvi interest scire, quis libri de veteri Medicinâ auctor fuerit, an aliquis ex sex Medicis ejusdem familiæ, Hippocratis nomine insignibus, an Polybius divini senis discipulus, qui omnes ferè simili stylo scripserunt. Sed constat rudimentum artis libro isto adumbratum, nullum progressum fecisse; divinumque senem, calidum, frigidum, humidum, siccum, naturæ cœva, sensibus obvia, & energitica, ad benè medendum accommodata expertum fuisse. Uno verbo calidum aliorum certâ temperatione determinatum, triplici alteratione alimentum coquit, ut id prorsus assimilet.

Ergo alimenta eò ad coquendum faciliora quò propius ad ventriculi temperiem accedunt.

Proponebat Parisiis JOANNES-MATHÆUS LE BERT,
Parifinus, Baccalaureus Medicus, A. R. S. H. 1715.